

# Viadi ristgà tranter schanza e sceptica

Dieta per lantschar il project «Las-Alps-infoteca» a Cuira

DA MARTIN CABALZAR

■ **Passa 100 personas da las regiuns alpinas han discutà venderdi e son- da en la sala dal cussegl grond a Cuira sch'ina chasa da medias da las Alps saja giavischada. La finamira saja auta, ussa saja quai da sa stentar per che questa visiun vegnia sustegnida e realisada, è il facit da questa dieta.** Tant il parsura da la SRG.R sco il directur da RTR *Mariano Tschuor* ed il mainaproject *Ruedi Bruderer* èn cuntents cun il resultat da la dieta. Dals referats, dals lavuratoris e da las discussiuns saja resorti che l'idea da «Las-Alps-infoteca» per coliar il spazi cuminaivel da vita e la lavur cun la tecnologia e la finamira da daventar l'emprima adressa per intermediar cuntegn schurnalistics sur da las Alps saja ina gronda ed impurtanta incumbensa. La finamira saja auta e gagliarda, ma ins veglia la tegnair en mira cun persvasiun e perseveranza, ha ditg Mariano Tschuor a la fin da la dieta.

## Ilis proxims pass

Tar ilis proxims pass tutgi uss ina giada dad evaluar il resultat da la dieta e dals lavuratoris. Silsuenter vul Mariano Tschuor udir anc ina giada da las differentas personas ed instituziuns involvidas, schebain lur decleranzas positivadas a Cuira tegnan vinavant ed han era cuntinuitad. Tschert ch'i drova era daners per finanziar ina fasa da svilup. Per vegnir in pass vinavant dovri in mez milliun euros, la summa ch'è budgetada per pudair sviluppar e realisar Las-Alp-infoteca. Ins quinta cun ina lavur da preparaziun da dus onns. Plinavant duai vegnir installada ina gruppa da lavur che sa fatschenta cun l'organisaziun concreta d'in management da project. A la dieta n'ha anc nagin pudì dar il consentiment definitiv per ina finanziaziun.

## Participants da tut l'Europa

Las participantas ed ilis participants a la dieta Las-Alp-infoteca a Cuira èn vegnids da Klagenfurt, Gardaina, Bregenz, Vuclina, Dolomitas, Piemont, Lyon, ma er or da l'entira Svizra e da numeros auters lieus da las Alps. Represchentadas èn era stadas las grondas



Impressiuns da la dieta «Las-Alps-infoteca» en la sala dal cussegl grond a Cuira.

FOTO R. CANAL

chadainas da medias electronicas sco SF, ZDF, ORF, RAI, Bayerischer Rundfunk, Euronews e la chasa da medias Südostschweiz. Plinavant èn stadas preschentadas personas da la Cipra, dal Club alpin talian e svizzer, da la rait da vischnancas en las Alps sco era represchentants da la confederaziun, dal chantun Grischun, dal Tirolo dal sid, dal Montafun, sco era represchentants d'organisaziuns culturalas e d'universitads da differents pajais en las Alps. Remartgà han ins dentant era l'absenza da las organisaziuns Arge Alp e da Euro-montana.

## Ina vusch cuminaivla per las Alps

*Werner Bätzing* da l'Universitad da Erlangen vesa per Las-Alps-infoteca ina incumbensa impurtanta per «intermediar in purtret realistic da las Alps» ad

ina vasta publicitad europeica enfin als gremis politics, perquai che l'Europa prenda decisiuns impurtantas che pertutgan las regiuns alpinas. Ina chasa da medias fissia «in cler rinforz dals interess specifics dal territori alpin» sco quai che er divers votums or dal plenum han confermà. Per Bätzing saja quai in «rinforz da l'unitad en la diversitad» e la creaziun d'ina tala rait pudess «promover ina colliaziun sistemica da la discussiun da las Alps che surpasa ilis cunfins statals, linguistics e da mentalitad». Werner Bätzing sa dumonda dentant era, sche Cuira è vairamain il lieu adattà per in tal center sco citad da las Alps ordaifer la UE. Il referent principal è dentant vegnì a la conclusiun ch'ils aspects positivs sco la plurilinguitad tradiziunala da la Svizra e dal Grischun sajan pli fermes, er sch'ils aspects negativs muntian in

grond obstachel pervi da la posiziun dapersai da la Svizra en dumondas da las Alps.

## Barat da mainis enritgescha

Cussegliera federala *Eveline Widmer-Schlumpf* vuless savair tge che sa chatta davos la proxima muntogna. Per la magistrata grischuna munta il contact sur vals e cunfins dapli che mo mirveglias. Quest barat inritgeschia nossa vita. Per pussibilitar questas experienzias sur cunfins en ina regiun alpina saja la plattafurma d'infurmaziun «Las-Alps-infoteca» in project interessant ch'ella persequiteschia cun interess. Sumeigliant argumentescha er il cusseglier guvernativ *Claudio Lardi* che considerescha l'idea sco in «mussavia bainvis ed impurtant per rimnar, filtrar, elavurar ed intermediar infurmaziuns ord las Alps».

Per la Cipra international e ses president *Dominik Siegrist* èn «Las-Alps-infoteca» ina «gronda schanza per la collavuraziun aifer las Alps» nua ch'ins veglia «sa metter a disposiziun sco partenari». A moda sumeglianta s'expriman era *Regula Imhof*, la substituta da la secretaria generala da la Convenziun da las Alps e *Hans Lozza*, il schef da communicaziun dal Parc Naziunal Svizzer. Omadus han discurrì d'ina plivalur, d'ina vusch cuminaivla e d'in instrument per rinforzar l'identitad en las Alps. *Andrea Masüger*, il schef operativ da las medias Südostschweiz, n'ha betg vulì lavagar il plaschair visiunar dal project, ma el è sa dumandà sche la basa saja realistica avunda, ubain sch'ins planiseschia betg ina «chasa da medias» che nagin veglia finalmain alimantar. Dapli speranza ha il schef operativ da Euronews *Michael Peters* che lavura gia oz cun schurnalists or da 40 naziunalitads sveglià.

*Marco Solari* ha fatg curaschi als iniziants cun sias decleraziuns che «l'utopia dad oz è la realitad da damaun». Tenor Solari vegnan talas iniziativa savens recepidas sco irritaziuns da l'equiliber, fagend er allusiun a ses project per in'exposiziun naziunala en ilis chantuns enturn il Gottard.

## Prontadad da muventar insatge

Per conclusiun da la dieta ha *Andreas Weissen* constatà che la voluntad da muventar insatge saja avant maun. Per cuntanscher la fascinaziun necessaria per il project dovria quai dentant curaschi, temp e cunzunt personas che crajan en il project. D'impurtanza sajan la finala er ilis daners, sco quai ch'ins ha constatà en las gruppas da lavur. Quels sajan dentant avant maun, sch'ins vesia il niz da la chaussa. Gist en la fasa da la discussiun da princip dovri perseveranza e flexibilitad en plirs regards, uschia era quai che pertutga la dumonda dal lieu da domicil da Las-Alps-infoteca, ha manegià Weissen.

Ina saira culturala cun *Acavoce*, *Ernst Bromeis*, *Mario Pacchioli* e *Laurant Brunetti* è stada ordvart divertenta ed ha gidà ad enfirmir ilis contacts persunals dals represchentants da las differentas regiuns alpinas.